

missionnaire de J. C. et sur tout d'y mourir coe il l'auoit tousjours demandé dans vne Chetieue cabane, au milieu des forets, et dans l'abandon de tout secours humain.

Après cela il se teut, s'entretenant en luy mesme avec Dieu il laissoit neantmoins eschaper de temps en temps ces mots sustinuit anima mea in verbo ejus, ou bien celles cy mater dei memento mei qui sont les dernieres parolles qu'il prononca auant que d'entrer dans l'agonie qui fut tousjours tres douce et fort tranquille.

Il auoit prié ses Compagnons de le faire souuenir quand ils le verroient près d'expirer de prononcer souuent les noms de Jesus et de marie s'il ne le faisoit pas de luy mesme. Ils n'y manquerent pas, et lors qu'ils le Crurent près de passer l'un d'eux Cria tout haut Jesvs Maria ce que le mourant repeta distinctement et plusieurs fois et coe si a Ces noms sacrés quelq⁹ Chose se fut présentée a luy, il leua tout d'un Coup les yeux au dessus de son Crucifix les tenant Collés sur cest objet qu'il sembloit regarder avec plaisir, et ainssi le visage riant et enflamé il expira sans aucune Conueulsion, et avec vne douceur qu'on peut apeller vn agreable sommeil.

ses deux pauvres Compagnons apres auoir verssé bien des larmes sur son Corps, et apres l'auoir acomodé de la maniere qu'il leur auoit prescrite le porterent deuotement en terre sonnante la Clochette coe il leur auoit dit, et dresserent vne grande Croix proche de son tombeau po⁹ seruir de marque aux passants.

Quand il fut question de s'embarquer po⁹ partir